

四庫全書

史部

欽定四庫全書

史部

皇清開國方略卷十二

內閣中書臣沈飈覆勘

總校官原任侍講臣王燕緒

蘇東國庫金書

皇

清國方略卷十二

太

宗文皇帝

天聰五年

天聰三年春正月庚申科爾沁部長來朝

初科爾沁與巴來朝

太

祖高皇帝賜號王謝圖汗以郡主妻之

見天命十一年六月天聰

二年九月

太宗統帥征察哈爾與巴率兵掠察哈爾邊境弗至期會

之地而還十二月

命侍臣索尼阿珠祜往責之與以

書曰昔者汝父助葉赫興兵

奧巴之父貝勒翁阿
岱來使見癸巳年

謀分我

地幸

天佑我國汝弗獲逞後我兵征烏拉牛山汝父子以兵助
烏拉又助葉赫殺我侍衛布揚古罪非一端應即興師
致討我

皇考寬仁遣使議和盟誓

天地相與修好後汝欲親來議和約定會所我

皇考赴約汝復不至此汝之欺誑也察哈爾興兵伐汝我不辭勞苦率師相救兵至農安塔察哈爾遂棄將克之城而遁彼時若非我兵相援爾尚得有今日耶察哈爾還兵之後汝來修好我

皇考復加優遇以女妻汝又厚賜金珠裘幣甲冑器用等物遣汝歸國及我

皇考升遐諸國銜哀各遣大臣子弟來弔汝于兩月後方

遣一下等屬員來此汝之負恩也向者通好時曾約一切敵國和則同和伐則同伐汝乃敗棄盟言與我讐敵之明國兩次通市汝之反覆無常也汝欲報怨于察哈爾屢遣使來約及我國興師爾竟不赴委我于敵遽爾先回汝行不踐言狡詐實甚今而後汝之心我更何以相信乎

太宗既繕書歷數其罪復

諭索尼阿珠祐曰汝等往見彼勿加以禮勿食其食厲色

待之即作欲歸狀以覘其情形

索尼阿珠祐齋書行十日至科爾沁有以牲致

饋者麾之去出所攜餼糧食之奧巴病足居別室索尼阿珠祐詣見郡主進禮物並以事畢即歸

諭旨告奧巴聞之扶掖至伴問曰此為誰索尼阿珠祐曰

吾儕

天聰皇帝使臣也爾有罪義當絕今特以公主故來覲問

耳奧巴語左右具饌索尼阿珠祐不顧而出奧巴恐

使台吉塞賴等問曰往者

上使至向我行禮與之食則食今爾等見我不拜具饌不

食即趨而出宜

皇上有所禮責于我耶索尼阿珠祐答曰吾儕非為爾來

也何拜為又何為食爾之食耶爾罪多端我

皇上震怒恐我等不能達意另有

諭旨于是以書授之即整轡欲行奧巴得書大驚令衆挽

留再三曰伏讀

上諭責我罪重心甚惶懼罔知所措既已獲此重罪若聽使者獨返罪滋重矣當令台吉拜斯噶爾及桑阿爾齋同使者往謝罪俟我足愈親往索尼阿珠祐曰吾儕奉

上命饋公主禮物事畢即行汝欲辨已罪強留我等偕二人以往我等宜為取此二人而來耶與已旋遣人

告曰令子弟去無益適以重上之怒我罪益深不如親往足雖病力疾就道死無所辭

終不可以安坐置辦冀釋

上怒也索尼阿珠祐答曰未令我同汝去亦未令我阻汝汝其自裁之與已又遣人告曰今欲親往決矣惟懼

上怒難解不我見而逐我耳索尼阿珠祐曰汝果引咎往朝必蒙我

皇上寬容弗汝遂也與已大喜留索尼阿珠祐十日送之先行囑曰我朝見無遣使報問

至尊之理爾既先行幸為我轉奏我以獲罪之故足雖疾
當令人扶掖來朝叩頭以謝如蒙

上寬容拜觀
天顏釋我罪戾我之願也
索尼阿珠祜還奏

太宗曰果能知罪改過猶可恕矣至是與巴來朝
駕出迎十里還

御殿宴之越二日

命巴克什庫爾禪希福等復申前書中語致詰與巴俱服
罪其私與明國交市願罰駝十馬百征察哈爾違
約遽歸亦願罰駝十馬百又越三日與巴獻馬一

甲一謝罪

太宗宥之

賜貂裘金鞵帶帽靴及朝鮮所貢皮帶財物及解歸復
賜甲冑緞布捨狝獮裘雕鞍金銀器皿等物
親率貝勒大臣出郊餞之越宿而還

丁丑議增直月理政貝勒

先是天命六年二月

太祖命

太宗同大貝勒代善二貝勒阿敏三貝勒莽古爾泰佐理

國中政事按月分直及

太宗即位仍令分月掌理至是傳

諭曰向因直月之故一切機務輒煩諸兄經理嗣後可令弟姪輩代之如有疎失咎坐現直者大貝勒等皆曰善遂以諸貝勒代理直月之事

二月戊子嚴禁科斂民財

先是察訊正黃旗千總科斂民間財物事謂因本

管官及筆帖式等至屯供應不敷故歛民間食物以餉之

太宗諭貝勒大臣曰出使之人定例各自備餼糧毋許科取于民近聞有違法妄行者不可不嚴為懲治諸臣皆受朕恩身居民上衣食亦已豐裕乃攫取貧民辛勤孳養之牲牢以供口腹貧民被此擾累何所恃以為生乎逃亡背叛職此之由嗣後事發除凡人照常處分外若係管糧官筆帖式及巡臺人虐民妄行定行處死又

諭曰正黃旗官員皆攫取民間食物朕已察知爾七旗大臣可各察本旗所屬人有攫取之事即行奏聞毋得容隱于是諸大臣各察出本旗事以奏

諭曰官員攫取民間食物若被旁人告發斷難寬宥因係朕自行察出姑宥之嗣後各宜省改前愆共矢公忠

庚子罰懲殺降將領

先是遣總兵官武訥格副將蘇納率滿洲兵八十人及蒙古全軍往征察哈爾降其邊境二千戶因

軍中流言降人賙我兵少謀殺我兵以歸明乃盡戮其男子俘其妻孥止釋兩台吉弗殺攜之還

太宗命以所俘獲分賚將士既而

諭責武訥格蘇納妄戮降人盡罰所得駝馬牛羊入官是

月甲辰

巡閱南路邊境城垣乙巳次穆家堡以郭郭有傾圯者

命葺之丙午次牛莊

命築新城高二丈二尺有五寸加雉堞除四隅外每面建

腰臺四座

賜督工諸臣宴翼日至耀州又翼日至海州凡城垣不堅者咸

命修築完固

三月戊午申定軍令于外藩

先是

頒敕科爾沁教漢柰曼喀爾喀喀喇沁諸部令遵行

本朝制度

事在正月

至是

命大臣阿什達爾漢等齎

敕與蒙古諸貝勒曰爾等既皆歸順凡遇出師期約宜各踴躍爭赴協力同心毋有後期我兵若征察哈爾凡管旗諸貝勒年七十以下十三以上俱從征違者罰馬百駝十遲至約會之地三日者罰馬十若往征明國每旗貝勒一台吉二以精兵百人從征違者罰馬千駝百遲至約會之地三日者罰馬十我軍入敵境以至出境有不至者罰馬千駝百于相約之地擅行擄掠者罰馬百

駝十

夏四月丙戌朔定文館職司

初

太祖製國書因心肇造備列軌範

太宗躬秉神聖之資復樂觀古來典籍以歷代帝王之得失為鑑並欲記注

國家政事以昭信史

命儒臣達海庫爾禪剛林蘇開武巴什扎素喀古爾嘉琿

托布齊瑚球占巴十人分為兩直繙譯典籍記注

政事

時名文館至崇德元年改增為弘文秘書國史三院

是月扎嚕特部內

齊汗

元太祖裔忠圖之子

科爾沁部貝勒布達齊

貝勒翁阿岱子與巴

弟各率其子來朝

五月丁未議蒙古部長越界駐牧罪

柰曼部衮楚克巴圖魯

來歸見元年七月

扎嚕特部內齊

汗

來朝見前

瑚弼爾圖色本瑪尼

三人來歸並見二年十二月

巴雅

爾圖

色本兄

以私越地界駐牧自行議罪請各罰馬

百駝十

命從寬各罰馬一

戊申分勦明兵于海島

先是明總兵毛文龍據南海皮島招集遼民令富民皆冒毛姓為其子孫民有逃奔者輒殺之捏稱陣獲誑報冒功明之君臣皆信之陞為大都督凡島中官民賞罰黜陟生殺許以便宜行事文龍欲與我國通好屢遣使致書

太宗因遣官科廓率從者四人齎書答之往來數次文龍乃執科廓等送往燕京尋寧遠巡撫袁崇煥以文龍與我國私通殺之其部衆有踞朝鮮之鐵山者太宗命總兵官楞額哩率兵五百往剿斬三百七十級生擒一百四十人獲馬二十一至是分

命諸將搜勦海島之舊屬毛文龍者石廷柱率兵二百往黃骨島有自石城島來者斬二百人生擒十九人圖魯什率兵一百往旅順口斬二十五人生擒二

人羅璧哲爾德青善雅賴率兵一千往新城一路
遇採獲船四擊斃六十人毀其船富克察率兵後
行遇採獲者七十人盡殲之錫爾都塔哈布各率
兵五十至鹿島斬十九人生擒三人布爾吉率兵
赴雅爾古地斬採獲之朝鮮國十人明國三人復
同扈什塔躡踪捕緝斬五十二人生擒十人以歸
六月丁卯土默特部入貢

土默特部長鄂木布

元太祖裔格根
汗之三世孫

遣四十五人

貢駝馬綵緞等物奏言願率部衆歸附其同部台
吉卓爾畢泰阿渾阿巴當索諾木等來朝亦貢禮
物

秋七月乙未庫爾喀部入貢

庫爾喀部頭目九人來朝以海豹皮入貢是月喀
爾喀貝勒巴哈達爾漢之子拜渾岱拉巴泰滿珠
什哩三台吉率三十五人來奏前為察哈爾侵掠
俱逃入科爾沁今自科爾沁來歸

八月庚午定行軍賞罰例

凡八八分貝勒等臨陣時如七旗敗走而一旗獨能迎戰保全七旗者即以敗走七旗所屬人員給與若七旗迎戰而一旗敗走者削爵以所屬人員分給七旗如一旗戰者半走者半即以走者之所屬人員給與本旗迎戰貝勒仍覈其戰功另行賞賚若七旗未及戰而一旗首先迎戰亦按其功之大小及所獲多寡行賞若兩軍接戰或追擊敵兵

不加詳審妄行衝突者罰所乘馬及所獲人口入官

九月壬午朔校試儒生

前期

詔曰自古國家文武並用以武功戡禍亂以文教佐太平朕今欲振興文教于諸儒中考取其文藝明通者優獎之以昭作人之典諸貝勒及滿漢蒙古之家所有儒生俱令考試取中者別以丁償之至是預試者三百餘人

命諸臣校別優劣得二百人凡隸

內府及貝勒大臣家為奴者盡皆拔出免二丁差徭
一等者賞緞二疋二等三等者賞布二疋並候錄
用是月南界守將伊爾登等率兵勦舊屬毛文龍
之獐子島獲船四沉一百三人于水中生擒二十
七人來獻

太宗遣大臣揚古利楞額哩阿山雅賴率騎兵一百步兵
二百巡緝採獲明人至雅爾古斬九十六級生擒

千總三員及從役十六人以歸

冬十月辛未會師至喀喇沁境定議征明

先是六月乙丑

諭貝勒大臣曰戰爭者生民之危事太平者國家之禎祥
前曾與明議和明之君臣若聽朕言克成和好共享太
平則我國採獲開礦與之交易若彼不願太平而樂于
用兵則我國所少者不過緞帛等物耳我國果竭力耕
織以裕衣食之源即不得緞帛等物亦何傷哉我屢欲

和而彼不從我豈可坐待定當整旅西征令蒙古科爾沁喀爾喀扎魯特敖漢柰曼諸國合師並舉勿似昔日之專以我兵往夫師徒既衆供億浩繁陸運糗糧恐不能給必用船載至河西西寧堡方無貽誤宜豫採木植廣造舟楫以備用朕之所見如此但一人所見未必悉協于衆詢謀僉同乃克濟事有謀略素裕可裨益軍政者各以所見入告朕將擇而用之越二旬

命貝勒濟爾哈朗德格類岳託阿濟格率兵萬人征明錦

州寧遠秣馬田野中凡一月俘獲以三千計焚其積聚乃還九月甲辰

召外藩蒙古部長各率兵來會十月癸丑

太宗親統師啟行以來朝喀喇沁台吉布爾哈圖曾受賞于明熟識路徑用為嚮導丙辰師次陽什穆河

賜宴會師之柰曼部袞楚克巴圖魯札嚕特部內齊汗色本桑圖喀巴海瑚弼爾圖之子岱青等巴林部色特爾塞稜之馬匹疲瘦衆蒙古貝勒議罰其甲冑

馬駝

命俟班師再議

諭責之曰朕曾諭爾等善養馬匹勿輕馳騁以備征討之用爾等違諭用以畋獵致馬匹羸瘠來兵遂少會亦何益耶庚申師次納哩特河察哈爾五千人來降壬戌駐營遼河

命總兵官武訥格副將蘇納率兵四百躡追察哈爾部衆之逃奔明國者俘百人獲馬八十駝七十六牛羊

各百餘丙寅科爾沁部奧巴偕洪果爾

貝勒莽圖
古斯弟

美

奧巴
從兄

武克善

莽古
斯孫

巴達禮

奧巴
子

諸貝勒台吉各

率兵來會

駕迎之三里許還

御行幄宴之是日集諸貝勒大臣暨外藩蒙古貝勒台吉
等

諭曰明國屢背盟誓蒙古察哈爾國暴虐無道皆當征討
今大兵既集所向宜何先爾等其共議之諸貝勒大臣

有謂距察哈爾國遼遠人馬勞苦宜退兵者有謂
大軍千里而來羣力已合宜征明者

太宗以征明之議為是遂統師向明境發越五日至喀喇
沁之青城大貝勒代善三貝勒莽古爾泰晚詣

御幄止諸貝勒大臣于外而先入密議班師既退貝勒岳
託濟爾哈朗薩哈璘阿巴泰杜度阿濟格豪格入
太宗默坐意不懌岳託奏諸將皆集于外待

上諭旨

太宗憮然曰可令諸將各歸帳我謀既隳又何待為可勿宣布所發軍令岳託濟爾哈朗曰臣等未識所以請

上明示

太宗曰我已定策而兩兄不從謂我兵深入敵境勞師襲遠若糧匱馬疲何以為歸計縱得入邊而明人會各路兵環攻則衆寡不敵倘從後堵截恐無歸路以此為辭固執不從伊等既見及此初何為緘默不言使朕遠涉至此耶衆志未孚朕是以不懌耳岳託濟爾哈朗及諸

貝勒皆勸

上決計進取于是令管旗八大臣往與大貝勒三貝勒議
夜半議定乃

頒敕諭曰朕仰承

天命興師伐明拒戰者不得不誅若歸降者雖雞豚勿侵
擾俘獲之人勿離散其父子夫婦毋淫人婦女毋掠人
衣服毋拆廬舍祠宇毋毀器皿毋伐果木如違令殺降
淫婦女者斬毀廬舍祠宇伐果木掠衣服及離大纛入

村落私掠者鞭一百又勿食明人熟食勿酗酒聞山海關內多有鴆毒更宜謹慎馬或羸瘦可量煮豆飼之肥者止宜秣草凡採取柴草須聚集衆人以一人為首有離衆馳往者拏究如有故違軍令者與不行嚴禁之管旗大臣及領隊各官並治罪弗貸

戊寅克明洪山口

大軍自喀喇沁之青城行四日次老河

命貝勒濟爾哈朗岳託率右翼四旗兵及右翼諸部蒙古

兵攻大安口貝勒阿巴泰阿濟格率右翼四旗兵
及左翼諸部蒙古兵攻龍井關各

授以方略令相機而行

太宗統師向洪山口進發丁丑左翼兵攻克龍井關隕其
水關而入明副將易愛叅將王遵臣聞礮聲自漢
兒莊率兵至我兵擊敗敵騎兵三隊步兵二隊斬
易愛王遵臣盡殲其衆又斬哨卒之自三屯營至
者師薄漢兒莊城其副將標下官李豐率城內民

雞髮出降大軍登城駐營秋毫不擾潘家口守備
金有光遣中軍旗鼓范民良蔣進喬齋書來降三
貝勒莽古爾泰奏授守備為遊擊旗鼓為備禦給
劄而遣之戊寅

太宗親統師攻克洪山口入駐城內擢降人方過清為備
禦與

敕令守洪山口又遁匿山中之千總一員把總一員聞城
克率百人擐甲執械來降因擢千總為備禦把總

為千總是日貝勒濟爾哈朗岳託率右翼兵攻克
大安口毀其水關明馬蘭營前哨兵馳至大安口
將近城我軍擊走之濟爾哈朗率兵一半擊敗兩
營敵兵于山上追至馬蘭營盡殲之明騎兵自遵
化來援列兩營深林中鳴角擊鼓岳託亦率兵一
半進擊大敗之得脫者僅數人兩貝勒甫拜

天畢忽又有一營敵兵至我軍未及成列爭先擊斬自辰
迄巳共敗敵兵五營馬蘭營馬蘭口大安營三城

俱降我軍遂趨石門恐兩旁有敵兵因立營曠野
以便瞭望明兵先聞礮聲以為蒙古兵至倉皇赴
戰悉就殲後知為我兵懼不復出石門寨驛丞一
生員一偕五人齎書來降

十一月甲申克遵化城

大軍既克洪山口總兵官揚古利率兵先至遵化
辛巳

太宗親統師距城五里而營三貝勒莽古爾泰率左翼兵

自漢兒莊來會

太宗與遵化城中巡撫王元雅等

書曰我國為爾國侮慢侵陵致成七恨乃告

天興師幸蒙

上天垂鑒以我為直舉遼東廣寧諸地悉以畀我我猶欲
罷兵息民屢遣人致書議和爾君臣妄自尊大且不容我
書過山海關爰整師旅大舉而至自喜峯口迤西大安口
迤東拒敵之兵悉已誅戮歸順人民秋毫無犯今爾等

若輸誠來降功名富貴當與共之嘗聞良禽擇木而棲
俊傑相時而動爾等可不深念耶至民人皆我赤子來歸
之後自當加以恩養爾等可速自審處毋貽後時之悔
十一月壬午朔明總兵趙率教以兵四千援遵化
我哨兵來告貝勒阿濟格等率左翼四旗及蒙古
兵奮擊敗之乘勝躡追

太宗率數騎環視遵化城可攻之地遇明敗兵至掩擊之
趙率教為阿濟格所斬三貝勒莽古爾泰生擒明

中軍臧調元來見

太宗曰可收養之養人後必有效遂令薙髮有棄弓歸降者亦收養仍給

敕各還原籍羅文峪守備李思禮齋糧冊來降擢為遊擊貝勒濟爾哈朗等率右翼兵來會

太宗召集貝勒大臣定議攻城

授以方略正黃旗攻北面之西鑲黃旗攻北面之東正紅旗攻西面之北鑲紅旗攻西面之南鑲藍旗攻南

面之西正藍旗攻南面之東鑲白旗攻東面之南
正白旗攻東面之北甲申黎明列陣樹梯城下正
白旗兵薩木哈圖先登諸軍繼之遂克其城掩殺
其守陴兵四面皆潰巡撫王元雅走入署自經死
城中官兵人民等拒命者盡殺之

命以棺斂元雅屍傳

諭諸將曰我軍年來皆怯于攻城此城較前所攻之城更
堅薩木哈圖奮勇先登殊可嘉也乙酉以副將伊遜攻

城時礮傷其手創甚

親臨視之是日聞羅文峪民為從征蒙古所擾害因以蒙

古字漢字傳

諭曰朕會師証明志在綏定安輯之凡貝勒大臣有掠歸降地方財物者殺無赦擅殺降民者抵罪強取民物者計所取之數倍償其主朕方招徠人民若從征之人橫行擾害是與鬼蜮無異此而不誅將何以懲貝勒大臣等尚其仰體朕心廣宣德意焉己丑論功行賞喀克篤

哩造攻具如法且親督本旗兵先登由三等總兵

官擢為二等總兵官

即今二等子

巴篤禮指麾本旗兵

攻城有方由三等遊擊擢二等遊擊

即今二等輕車都尉和

勒多初襲其兄攸德赫參將職後以罪革至是以

署參將攻遵化城善射使所屬兵先登令仍襲其

兄參將職

即今一等輕車都尉

綏和多率兵先八旗兵進由

備禦擢三等遊擊

即今三等輕車都尉

薩木哈圖先八旗兵

登城授為備禦

即今騎都尉

世襲罔替有過失俱行赦

免家貧卽周恤之

賜號巴圖魯與喀克篤哩巴篤禮並

親酌以金卮

賜蟒緞及駝馬扈什布第二登城

親酌以銀卮與第三登城之多禮善合授備禦

兩人共管一佐領下

人茂巴禮第四登城並

賜緞布馬牛烏嚕特蒙古阿海先登因後兵不繼陣亡授

其父阿邦為備禦

賜蟒緞一緞十九布二百馬牛各十庚寅

諭羣臣曰頃因克遵化各旗大臣至登城士卒俱以次賞
賚者非以大臣等身自登城也嘉其督率盡善備具堅
固耳嗣後視此為例朕與爾等經歷險遠艱苦至此已
蒙

天佑克奏膚功諸臣尤宜加意約束所屬人員愛士卒如
子弟則所屬士卒亦視爾等如父母平時克遵教令臨
陣必竭誠効命不違紀律矣倘各旗大臣不加訓飭以

致妄行不誅則紀律廢弛而為惡者益熾誅之則曾經
効力之兵而以無知蒙罪又實可憫爾等有管兵之責
者當勤加教訓以副朕意壬辰明喜峯口叅將遣千總
二員把總二員齎降書至給

敕諭及令旗禁戒蒙古擾害漢人

賜叅將緞二十把總各緞一從者各緞袍一

癸巳進征燕京

以叅將英固爾岱遊擊李思忠文館范文程率備

御八兵八百留守遵化

太宗統師離遵化城二十五里駐營甲午進軍薊州前哨
遇明兵五百與戰生擒十五人獲馬二十乙未次
三河縣獲一漢人令持書招降丙申

命左翼貝勒率兵三千赴通州相視渡口

太宗自三河縣行二十里前哨捕一人送至訊以敵兵消
息其人云大同宣府兩鎮兵現在順義縣遂

命貝勒阿巴泰岳託率左翼二旗及蒙古二旗兵往擊之

敗明總兵滿桂侯世祿軍獲馬千餘駝百餘順義
知縣率衆來降

太宗至通州渡河駐營城北傳

諭各城曰我國素以忠順守邊爾萬厯皇帝妄預邊外之
事曲在葉赫而強為庇護直在我國而強欲戕害屢肆
侵陵大恨有七我知其終不相容也昭告于

天興師致討

天佑我國先賜我河東地我

皇考思戢干戈與民休息遣人致書講和而爾國不從既而

天又賜我河西地我復屢次遣使講和爾天啟皇帝崇禎
皇帝仍加欺陵使去滿洲國皇帝帝號母自製國寶我
亦樂于和好遂欲去帝號稱汗令爾國製印又不從故
我復告

天興師由捷徑而入破釜沉舟斷不返旆爾明之君臣視
用兵為易事漠然不以愛民為念不願和好而樂兵戈

今我軍至矣用兵宜易事乎凡爾紳衿軍民有歸順者
我必加撫養其違抗不順者不得已而誅之此非予誅
之乃爾君自殺之也若謂我國褊小不宜稱帝古之遼
金元俱自小國而成帝業亦曾禁其稱帝耶且爾明太
祖昔曾為僧賴天佑之俾成帝業豈有一姓受命永久
不移之理乎天運循環無往不復有天子而廢為匹夫
者亦有匹夫而起為天子者此皆

天意非人之所能為也

上天既已佑我爾明國乃使我去帝號

天其鑒之矣我以抱恨之故與師恐不知者以為恃強攻戰故此諭知戊戌進軍駐牧馬廠距燕京約二十里廠南五里許有牧馬園我兵圍之其管馬太監二名及三百餘人出降辛丑

太宗統師營于燕京城北土城關之東兩翼兵營于東北偵知明總兵滿桂侯世祿等俱集德勝門

太宗率諸貝勒領右翼兵前進哨兵又告瞭見東南隅有

寧遠巡撫袁崇煥錦州總兵祖大壽等以兵來援
太宗至德勝門外審視虛實

諭火器營兵進前發礮俟敵發礮畢蒙古兵及兩紅旗兵
由西面徑進正黃旗兵從旁衝擊傳

諭左翼貝勒領兵迎擊于是兩路進兵復

命御前兵繼後遇敵潰遁者追擊之時袁崇煥祖大壽屯
兵二萬于沙窩門外我左翼兵二千分為三隊領
蘇大臣哈寧阿鄂羅塞臣等先進貝勒阿巴泰阿

濟格多爾袞豪格繼之聞敵伏兵右偏甚衆因約
我軍入隘口宜趨右偏不趨右偏而由正路入者
罪與避敵同此入隘口豪格獨趨右偏敗其伏兵
追殺至城壕阿巴泰阿濟格多爾袞不趨右偏由
正路入亦擊敗敵兵追殺至城壕阿濟格所乘馬
被創死正白旗領叅大臣康古哩未至城壕止于
中途貝勒多鐸以年幼與三貝勒莽古爾泰留後
遇明兵來犯禦卻之額駙恩格德爾領喀爾喀蒙

古軍偕其弟莽果勒岱及領扎嚕特兵之巴克多爾濟見敵兵一隊距城稍遠屯樹林內不俟整隊驟進接戰旋潰奔總兵官武訥格扎嚕特貝勒色本與其弟瑪尼突入奮戰始擊敗敵兵收軍後諸貝勒大臣會議阿巴泰違衆約不從右偏進與同旗豪格相離罪應削爵奪所屬人員給與豪格

太宗曰阿巴泰非怯懦者特以顧其二子致離豪格耳朕奈何以子故加罪于兄因宥之以康古哩及叅將郎球

漢岱等逗留中途削職罰贖奪其俘獲以哈寧阿
鄂羅塞臣善戰俱授備禦恩格德爾莽果勒岱自
蒙古首先投誠功大免削職仍罰贖奪其俘獲已
克多爾濟等削職罰贖奪其俘獲以所罰之半給
武訥格令分賞同時迎戰將士癸卯

太宗率諸貝勒環閱燕京城乙巳駐南海子丁未進軍距
關廟二里時袁崇煥祖大壽營于城東南隅樹柵
木為衛

太宗令我軍移與相近列營

親率諸貝勒輕騎往視進攻之處

諭曰路隘且險若傷我軍士雖勝不足多也諸貝勒屢請

攻城

太宗諭曰朕仰承

天眷攻城必克但所慮者倘失我一二良將即得百城亦
不足喜朕視將卒如子嘗聞語云子賢父母雖無積蓄
終能成立子不肖雖有積蓄不能守也此時正當善撫

我軍蓄養精銳耳遂止弗攻先是獲明太監二人以副將高鴻中叅將鮑承先寯完我已克什達海監守之至是鴻中承先導

上所授密計坐近二太監故作耳語云今日撤兵乃

上計也頃見

上單騎向敵敵有二人來見

上語良久乃去意袁巡撫有密約此事可立就矣時楊太

監者佯卧竊聽悉記其言庚戌

命縱楊太監歸嗣聞楊太監以竊聽之言奏明崇禎帝遂
執袁崇煥下獄祖大壽大驚率所部奔錦州毀山
海關而出

十二月辛亥朔克良鄉城

大軍趨良鄉

太宗命諸貝勒殿後行獵海子左翼諸貝勒因逐獐突馳
于前

太宗見之

諭曰朕以爾等殿後是以行獵今爾等皆前來誰在後軍耶諸貝勒俱奏請議罪

太宗曰爾等孺子忘殿後而貪射獐故至此姑免議重罪止各罰馬一給右翼諸貝勒遂趨良鄉克其城以駐軍所獲牛馬羸驢均給兵丁庚申祭纛良鄉東山岡頒賚將士銀兩緞衣總兵官武訥格率蒙古兩旗兵攻取固安縣盡殲其衆

命巴克什庫爾禪赴固安賞諸將士銀兩緞衣時房山縣

有生員三人來降賞而遣之

諭曰聞爾房山縣民奉祀金朝皇帝是亦守禮之民也今

蒙

天佑我軍已至燕京大業若成爾等皆屬我倘不能即成
恐貽禍爾等須杜門安坐以俟我業之成也遂

命貝勒阿巴泰薩哈璘齎牲帛祭金太祖世宗陵為文以
告曰嘗聞二帝功高德盛予中心緬懷夢寐景仰茲統師
至良鄉知二帝陵寢在焉雖時異世殊而春秋舉祀至

今稱頌弗衰誠所謂德愈久而彌光也特備牲牢遣阿
巴泰薩哈璘代祭併白子懷我國介在邊陲世守忠信
明萬厯君無故害我

二祖彼雖出此我猶尊之為君同遼東副將吳希漢刑白
馬烏牛盟誓

天地豎碑邊界約曰漢人出邊者殛漢人滿洲入邊者殛
滿洲既盟之後直道自守及我與葉赫兩國構釁彼曲
我直明萬厯君不以公道區區反庇理曲之葉赫陳兵

邊外代為守禦屢欺我理直之滿洲致成七大恨我見其不能相容必欲見害故告

天興師蒙

上天垂鑒不計國之大小止論事之曲直遂以我為直界我以明遼東迤東之地後我復遣人議和彼以為欺我如泰山之壓累卵藐視我如草芥欺陵不已故復興師天又畀我以河西地後我欲息兵戈享太平開誠布公不作詭計屢遣議和之使明崇禎君更肆欺陵欲索還

天畀我之土地去我帝號國寶我以

天賜土地不可退還止議去帝號稱汗不另製寶令彼造
印與我彼復不從我故發憤興師凡降城堡之不降者我非樂
犯惟誅其軍士之抗拒者攻其城堡之不降者我非樂
于誅之攻之也皆明國君妄自尊大不允議和不啻彼
自誅之自攻之耳夫我深雪讐之志而彼恥城下之盟
兵甲相尋積漸至此

天實為之于我何預雖然我猶不為己甚復欲與彼議和

乃彼恃其國大兵多蔑理違

天將我之言置若罔聞若杓鑒之不相入故予披漚悃忱
祭告惟二帝英靈昭鑒而默佑之

丁卯擊敗明兵于永定門南

大軍還自良鄉至蘆溝橋遇明副將沈姓率兵六
千人來禦

太宗遣右翼五旗兵進擊

時左右翼各有蒙古一旗故
右翼五旗合左翼則為十旗不

移時悉殲之生擒官一員擇取甲冑馬匹之善者

餘悉棄置進距京城二十里有敵兵一營擊敗之
晚至京城西南隅駐營

命副將阿山遊擊圖嚕什視環城敵兵擒一人訊之知永
定門南二里許有滿桂黑雲龍麻登雲孫祖壽四
總兵領步騎四萬結柵木四面列鎗礮十重遂

諭諸將士以三鼓進兵列陣及旦十旗兵齊進敗敵毀柵
而入陣斬滿桂孫祖壽副將叅遊等官凡三十餘
人千把總無算生擒總兵黑雲龍麻登雲方我軍

進薄敵柵敵軍鎗礮矢石交下如雨

太宗憐惜將士惻然隕涕及收軍無一傷者戊辰

命以陣獲馬六千擇其善者先賞給八大臣及總兵副將等官諸臣奏曰荷

天眷佑

皇上威福貺此大敵所獲諸物

上與諸貝勒不先擇取臣等如何敢受

太宗諭曰我命汝等對敵明兵鎗礮發時朕為爾等心甚

憂悔幸邀

天佑爾諸臣未被創擊敗敵兵雖加賞賚朕猶以為未足也已已大軍移駐京城西北庚午移駐德勝門外前哨圖嚕什錫爾納勞薩等兩遇明兵自京城出俱擊敗之斬一百五十人獲馬一百二十有奇巴克什達海愛巴禮奉

命齎書與明議和一置德勝門外一置安定門外貝勒阿巴泰濟爾哈朗阿濟格杜度薩哈璘同總兵官揚

古利率兵三千徇通州焚毀其船遂攻張家灣克之丙子

太宗旋師通州渡河駐營丁丑貝勒岳託薩哈璘豪格率兵四千前行攻克香河縣時沙河驛有蒙古五百人聞我兵至出奔山海關我兵追及之五百人據山崖立寨我兵步登悉殲之又焚通州河內船約千餘是日

太宗與大貝勒代善等率護軍及火器營兵五百名往視

薊州情形會有山海關步兵五千來援薊州距城二里許與我兵遇敵兵不及入城遂立營環列車盾鎗礮諸貝勒率兵衝擊悉殲之方擊敵步兵時命代善指揮左翼四旗攻其東面

太宗親指揮右翼正黃正紅鑲紅三旗攻其西面貝勒杜度傷足遊擊額爾濟格烏爾坤被創卒正紅鑲紅兩旗不進攻所當敵壘總兵官揚古利同內大臣侍衛率正黃旗軍士攻入大敗敵兵

命以兩紅旗規避各官贖罪之物盡給揚古利令分賞進
攻諸將士戊寅叅將英固爾岱自遵化奏云密雲
總督薊州道合兵夜至遵化四面夾攻我兵出禦
敵兵斬殺甚衆敵遂卻次日敵以馬兵列陣我兵
與戰敵旋奔入步兵營止殺其殿後兵五人生擒
答應官一員敵兵夜遁翼旦我兵追躡其後斬馬
兵百人步兵千餘人

太宗遣貝勒杜度統兵往駐遵化以喀喇沁台吉布爾哈

圖率兵駐羅文峪大軍向永平進發

皇清開國方略卷十二

欽定四庫全書

皇清開國方略卷十三

太宗文皇帝

天聰四年庚午

天聰四年春正月甲申克明永平

先是大軍自明燕京徇通州薊州正月辛巳朔至
榛子鎮其城中舊未設官

太宗頒諭居民令降遂行至沙河驛

命巴克什達海及副將石廷柱等同陣獲總兵麻登雲招

撫城中人榜示城門城中革職遊擊卜文煥率驛官生員耆民等來降

誠諭士卒于民間雞豚秋毫無犯抵灤河駐軍壬午進薄永平

太宗率諸貝勒環視進攻處令十旗兵環城立營是夜前哨將圖魯什擒一人來獻訊之云劉興祚甫自永

平往太平寨

興祚明之開原人初干法開原道將捷之乃棄父母妻子來降改名愛塔

太祖既取遼東授副將管益復金三州每婪索民間財物復屢與明人私通論罪數次仍

恩養之天聰二年興祚遣二僕致書于明總兵毛文龍事覺

太宗命釋興祚弟問止誅其僕興祚旋與弟興治謀使弟興賢逃附毛文龍詭語人曰吾弟已逃吾必被誅當自經死因其妻之母為貝勒薩哈璘之乳媪付書其妻持送貝勒並以書付其妻持送巴克什達海具言屢被讒毀日夜憂懼不得已而為此拙計又作書付其僕以與巴克什庫爾禪令葬其屍于扎穆谷中俟其妻妾及僕既行乃給一簪者至別室醉而縊殺之飾為已屍遂焚其室潛逃達海庫爾禪素與友善得其書即赴其家不知為詐也撫屍大慟以死狀奏

太宗命其子五十襲副將職時大軍將征察哈爾達海庫爾禪奏以五十代興治隨征興治率其兄弟等詐以遵兄遺言葬骸骨於扎穆谷遂逃去後有明人來降告知興祚未死乃逮繫五十及興祚母妻並

其兄弟之妻子于獄興祚遂為明將隨巡撫袁崇煥至永平袁崇煥入衛燕京令興祚守沙河興祚因馬疲于永平營易馬二十匹攜所隨十五人蒙古兵五百以行嗣聞袁崇煥下獄遂不赴沙河直趨太平寨遇我

朝從征之喀喇沁蒙古載所俘會食途次興祚襲殺五十人令兵役持二十級赴城中兵備道鄭國昌處請賞有永平易馬時隨去營兵遣還至是為我朝大兵前哨所擒以興祚自山海關至永平後蹤跡告

于是集貝勒大臣

諭曰朕思擒劉興祚勝得永平彼忘朕格外恩養詭計潛

逃被

上天譴責仍為我擒未可知也

命貝勒阿巴泰濟爾哈朗率官八員兵五百追之

兩貝勒
星夜行

及旦見劉興祚引兵趨山海關阿巴泰馳圍其前
濟爾哈朗躡擊其後陣斬劉興祚并殲衆兵生擒

其弟劉興賢

太宗命磔劉興祚之屍以徇

癸未

命副將阿山葉臣選部下二十四人乘夜攻城

召入御幄

諭曰攻城時須令四人樹梯先登每旁各令二人立次令

四人速登又次令十六人絡繹而登爾阿山葉臣乃繼

其後復

指授應攻之處令每旗官一員率兵一千助之甲申寅刻
薄城樹雲梯冒鎗礮矢石奮戰城上礮裂藥發明
兵在北面者自焚擾亂我軍悉登阿山葉臣令衆
軍環立城上以待曉宣布

上令曰敵兵拒戰者殺之其不戰而歸順者悉收卹毋妄
殺城中兵備道鄭國昌知府張鳳奇推官羅成功皆仰
藥死同知魏君謨參將楊春革職武官焦慶延越
城逃知縣張養初戶部郎中陳此心革職太僕寺卿

陳王庭兵備道白養粹行人司崔及第戶部主事
白養元知縣白珩遊擊楊聲遠永平衛掌印陳清
華盧龍衛掌印王業宏東勝衛掌印陳延美革職
副將孟喬芳楊文魁參將羅墀都司高攀桂等皆
降及旦

命貝勒濟爾哈朗薩哈璘偕巴克什達海愛巴禮等入城
安撫官民察驗倉庫丙戌城中歸順文武官集東
門外山岡朝見

御營

太宗率諸貝勒入城環視街衢出東門官民擁道環跪懽

呼

萬歲

命濟爾哈朗薩哈璘統兵一萬守城擢白養粹為永平巡

撫以孟喬芳楊文魁為副將領本城汛兵丁亥

太宗統師向山海關移營留濟爾哈朗薩哈璘鎮永平傳諭曰凡有舉動惟求萬全若敵兵至勿輕出城但須秣馬

御營

以待我兵居守城中可分置漢人于一隅撥與房屋書其姓名于門區處停妥其被戮屍骸可于高阜處掘坎瘞之是日鎮守永平兩貝勒令開城門縱莊村百姓各還其家有生員周姓家人李春旺造言將盡屠居民煽惑衆心知縣張養初以告兩貝勒遂誅李春旺以徇戍子貝勒阿巴泰岳託豪格率副將孟喬芳楊文魁遊擊楊聲遠及兵四百自永平至

召喬芳文魁聲遠酌以金卮

諭曰朕不似爾明朝之君與臣下情意隔絕凡我臣僚皆令侍坐各吐衷曲飲食同之喬芳等奏曰臣等在明國不但不能進見朝廷即親近之臣亦難見也

命降兵以白布書新兵各綴于背駐

御營外

太宗出行幄觀之

諭曰若輩不耐寒甚苦野處可令棲宿莊村乃

命與八旗礮兵同赴莊村居住時鎮守永平兩貝勒以書
招降永平所屬州縣臺頭營副將王維城遣人乞
降給以劄付令旗鞍山堡千戶錢奇志以二牛來
請令旗卻其牛令巡撫白養粹給以招降書并令
旗遣之

丁酉克明灤州

先是大軍克永平明兵潰遁者俱入昌黎縣

太宗遣教漢柰曼巴林扎魯特諸貝勒率蒙古兵攻之方

樹梯登城為敵推墮弗能克又

命大臣達爾漢喀克篤哩固三泰永順領兵千人馳往晝
夜進攻仍不克

太宗自撫寧移師攜新製梯楯至昌黎復加修整以備攻
城之用

諭將士曰烏鎗火礮自遠而至目不得見避之誠難至于
矢石乃目力所及可以引避爾等宜善為攻擊于是右
翼四旗攻其南左翼四旗攻其東教漢柰曼巴林

扎魯特攻其北布列雲梯將登城城上滾木礮石
鎗礮齊下火燎梯折復移挨牌近城下欲鑿其城
而乏鋤鑿大貝勒代善遣人以不能攻克奏

詔罷攻還駐永平北河岸以時方東作

諭示歸順各屯安心農業乘時耕種並給以牛具

命貝勒岳託豪格率官四十員兵千人攜前此俘獲人口

三千還瀋陽明建昌叅將馬光遠率衆來降擢為
副將灤州州同張文秀革職守備李繼全來降擢

文秀知州繼全仍為守備

命大臣納穆泰和碩圖圖爾格各率本旗兵往灤州

諭曰汝等往視情形若城內人民效順便可入城倘猶抗拒以計圖之不可圖則以梯攻如城中兵力尚強不得遽攻當即旋師又

命遊擊高鴻中巴克什庫爾禪率十人先往誘令開城衆軍隨入分城中房舍滿洲漢人各居其半籍城中庫銀四百七十兩倉糧一萬九石

太宗自永平移駐三屯營城西山上初三屯營漢兒莊喜
峯口潘家口洪山口俱經歸順至是復叛明總兵
楊姓領兵二千夜入三屯營城我哨卒獲生員一
太宗令持書招總兵楊姓降弗從乃焚其近城廬舍而還
巴克什達海副將石廷柱率兵千人收復漢兒莊
以其城守遊擊守備各一員來見

賜之食

諭曰爾等雖云歸順朕猶未信或爾等兄弟子姪及城中

士人隨朕往遵化或我兵入城駐守二者孰便遊擊等以發兵駐守衆心乃安對遂

命貝勒阿巴泰率所屬護軍偕達海等往城中分撥房舍留軍士駐防明遷安知縣朱雲台以降表至永平貝勒濟爾哈朗薩哈璘給以知縣劄付聞其地有郭姓侍郎遣官往召至則已遁獲其妻妾及幼子攜至永平給與房舍令知府贍養之翼日朱雲台之兄子至貝勒等慰諭遣還復遣遊擊卜文煥往

諭遷安人母因縱逃郭侍郎懷疑畏罪

辛丑擊敗明兵於遵化

明以騎兵五千攻遵化我鎮守貝勒杜度督兵擊敗之殺明副將一獲駝五十馬一千四百七十尋

明兵復圍喀喇沁營布爾哈圖

即三年十月用為嚮導之喀喇沁台

吉率兵拒戰擊敗之生擒明副將丁啟明及遊擊

一都司二生員一

太宗初聞遵化有敵兵令軍士整厲弓矢及擒敵哨卒至

遂

親率師馳往見明兵列柵為營

諭我軍先發礮次第進攻

躬登南岡閱戰礮毀敵柵我兵奮勇直入斬殺殆盡

命從臣慰問臨陣將帥會生擒明守備一人至訊之云燕

京之兵共八營副將八員遊擊十六員都司十六員

兵部侍郎劉之綸統率而來之綸即在山上營中

命大貝勒代善率八旗護軍往

諭曰朕以生擒勝於陣殺可生擒之代善以兵圍山招劉
之綸降不從遂攻破其營盡殲其衆劉之綸遁入
石巖中總兵官楞額哩子穆成額射殺之衆軍分
擊敵營惟一營乘夜遁去先後擊敗其七營生擒
遊擊一守備一壬寅

太宗以馬蘭峪既降復叛自遵化移兵令列礮及藥箭攻
城南北面火燃城西角樓環城房屋及鄰近屯堡
俱焚之先是攻克遵化時獲明郎中賈維鏐革職

道員馬思恭贍養之

事在三年十一月

尋擢思恭為巡撫

令管理附近歸順人民有薊州軍校于大軍趨燕
京後來奔遵化其妻係思恭女孫守將英固爾岱
察令完聚俱付思恭思恭潛遣之往薊州報云遵
化城中無滿洲精銳止餘傷殘兵卒且亦無多薊
州總兵張姓遂率兵來圍遵化至是鞠訊思恭罪
當死

太宗命宥之革巡撫職為民以賈維翰代署巡撫事

二月丙辰令羣臣愛惜勇士

先是辛亥朔

諭貝勒大臣曰昨攻取永平城副將阿山葉臣與猛士二十四人冒火奮力登城乃我國第一等驍勇人蒙

上天眷佑幸俱無恙朕甚愛惜之前以巴圖魯薩木哈圖攻遵化城先登驍勇出衆已有旨後遇攻城勿令再登及攻昌黎縣薩木哈圖又復預焉朕心愴然自後此等驍勇建功之人但當令在諸貝勒大臣左右督衆並進

如彼欲率先攻城當阻止之以副朕愛惜材勇之意丙

辰

諭曰爾等視本旗効力勞苦之人當如身親其勞而惻然憐憫則効力者益感激奮勵樂為之用若不加憐憫而任意驅使雖素所親信之人亦豈肯為之盡忠効用哉凡可用之人當俾為朝廷建功立業即廝卒中有一次先登克城者亦宜加意愛惜倘再遇攻城時縱彼有奮勇之心不可復令之往也

已未遺書明國議和

時

太宗欲息兵安民與明修好以婉辭致書令喀喇沁部塔

布囊蘇布地

乞盟來歸見
二年七月

作為已書遣其部下人

持往

書曰朵顏三衛都督都指揮蘇布地等奏臣等累世以來為皇帝固守邊圉今滿洲國以

強兵深入臣等不暇為備以致被困手足無措竊料滿洲兵或駐漢境或返本土勢不使臣等離其掌握臣等久受厚恩不勝惓惓是以馳奏皇帝若憫小民之苦解邊臣之怨交好滿洲國以罷師旅則朝廷赤子獲享太平而邊防屬國亦得蒙恩矣不然臣等愁困小民怨苦何時可已恐失愛養斯

民優恤屬國之道伏乞急允和議庶幾小民得事耕耘臣等亦得安堵惟願速籌修好焉尋

召總兵麻登雲

陣擒見三年十二月

郎中賈維鏞

三年十一月降

副將楊文

魁孟喬芳遊擊楊聲遠

三人並四年正月降

臧調元

陣擒見三年十

一宴之

諭曰明國君視如許將士之命竟同草芥常驅諸死地朕

屢遣使議和竟無一言相報何也麻登雲對曰明國君

幼冲執政者又復不忠各圖自保議和之事懼不

敢奏奏之而聽固為善矣一不見聽親族誅滅故

不敢言

太宗曰若然是

天賜我機也豈可棄之而去但駐兵屯守民不得耕耨無
以為生朕心惻焉已未致明崇禎帝

書曰邇者師旅頻興互相誅戮生民罹禍實甚

上天好生之德我兩國當共仰體之即我兩國之主以戰
爭之故不遑暇逸亦非所以自安也言念及此欲盟諸
天地共結和好永息干戈使兩國子孫臣庶奕世獲享太

平不然戰爭何時止息兩國何由得臻治安耶故特遣使致書議和惟熟計而明示之又與明國諸臣

書曰予欲罷兵通好共享太平屢遣使致書而爾等不從目前之役將士誅戮人民創殘實爾自貽戕害也前曾六次致書燕京議和矣意者以城下之盟為恥抑冀我兵之速退為幸故不相答耶夫得失者機也

天既假我以機我奈何棄之而去我將于

天所與之地耕屯以守爾八府之民豈能安意耕種縱得

耕種亦知誰收穫耶爾等宜勿膠柱務識權宜今我兩國之事惟和與戰別無他計和則爾國速受其福戰則爾國被禍何時可已爾錦州官員其傳語衆官共相商擁啟迪爾主急定和好之議可也先時爾諸臣誑君輕敵不允議和者或死鋒鏑或死國法曾有一人得免于罪而建立功名者乎予素不尚詭謀惟以至誠相告如執以為不可是

天運使然吾亦無如之何矣是日捉生將圖魯什勞薩錫

爾納錫特庫布延蘇爾德克宜福沙爾琥達率兵
至明邊境擊敗明哨卒生擒二人獲馬十七額駙
恩格德爾領喀爾喀蒙古巡徼見明兵三百立營
荒村直前掩擊敵騎三千忽自玉田縣衝出逼我
前哨總兵官武訥格整兵欲進明兵俱遁我兵追
襲其後獲馬百

三月壬午凱旋瀋陽

先是二月辛酉招太平寨不降

太宗諭侍臣曰若我兵攻克昌黎如此小寨自來歸順彼聞昌黎堅守不克是以不降且謂既降之後我或舍之而去明兵復來又將受戮其不敢降無足怪也甲子明榆林堡副將王世選來降永平新降之郎中陳此心見正月潛遣其子先遁復使家人攜貲以行為守門者所獲鞠訊論斬

太宗曰業已贍養數旬殺之何為不若縱還令攜妻子奴僕任其所往于是

金史卷之八十三 卷十三
賜馬二羸四銀二十兩縱之還自三年十月

親統師征明下遵化抵燕京轉克永平灤州遷安閱一百

三十餘日矣因

命班師以貝勒阿巴泰濟爾哈朗薩哈璘偕侍衛索尼叅
將甯完我遊擊喀木圖率正白鑲紅正藍三旗兵守永
平叅將鮑承先遊擊白格率鑲黃鑲藍二旗兵守
遷安大臣圖爾格納穆泰偕巴克什庫爾禪副將
高鴻中率正黃正紅鑲白三旗兵守灤州副將察

哈喇偕文館范文程率蒙古兵守遵化

諭曰明之土地人民

天已與我即我之土地人民也以我之人民而虐害之則
已收之疆宇將非我有他處人民亦無復有來歸者矣
爾等宜嚴飭軍士毋虐害歸順之民違者治罪弗貸

駕次灤河留駐三日叙將士攻克城邑功分別陞職壬申

前哨克宜福途遇明兵斬二人獲其馬來獻奏報
前有敵兵踞山築壘

命大臣伊爾登等率兵一百五十人往將近敵營會左翼
貝勒莽古爾泰阿濟格多爾袞先至擊破之斬六
十人獲馬八三月辛巳朔

旋蹕遼河岸

御行幄出迎之貝勒大臣及各官相繼叩見二貝勒阿敏
令大臣蒙阿圖問曰

皇上率諸貝勒証明往來想俱安吉大臣阿什達爾漢答
曰仰荷

天佑暨

皇上鴻庥往還悉得平安于是行凱旋飲至禮是日

駐蹕蒲河岸壬午還瀋陽

夏四月庚午擊敗明兵于大安口

先是明兵窺永平我偵卒望見軍塵馳告貝勒阿
巴泰等令前哨圖魯什率兵四十人往探總兵官
巴篤禮副將屯布魯以兵百人繼之圖魯什先至
擊敗明副將張洪謨哨兵乘勝追逐十餘里屯布

魯領大纛遇敵伏兵突出戰失利卻走巴篤禮之弟科耀馬中矢仆斃步走巴篤禮且護且戰獲敵馬與乘之乃得脫圖魯什殿後而還我兵傷者約二十人陣斬明兵約三十人貝勒阿巴泰等率兵出永平城敵已退二十餘里追之不及而返既而明開平兵與我永平樵採兵接戰守將鄂羅塞臣等擊敗之又有敵兵自樂亭撫寧等處乘夜攻灤州城南門復攻城西北隅及旦乃渡河去貝勒阿

巴泰薩哈璘率三旗兵往援辰刻次灤河岸聞明
兵退乃還鎮守灤州官于樵採處遇明總兵祖大
壽部下兵擊敗之獲馬四十及其旗幟來獻至是
明馬步兵四千攻大安口我總兵官武訥格副將
察哈喇自豐潤縣還過其地奮擊盡殲之又于樵
採處設伏擊敗敵兵獲馬二百三十時祖大壽遣
二人一至知府張養初所一至副將孟喬芳所養
初等出首訊之俱言使我等來覘滿洲兵多寡并

馬匹肥瘠倘兵力單弱祖總兵即親率六萬人來戰于是斬二人于漢人所居之市是月

命總兵官揚古利率兵二千征明錦州義州俘獲甚衆捉生將布爾堪武賚哈寧阿雅什塔率兵百人赴明境獲三人復渡大凌河馳斬明兵四十餘俘百六十人

五月壬辰勗鎮守永平諸臣善撫降衆

先是三月庚寅

太宗遣二貝勒阿敏率兵五千往代貝勒阿巴泰等鎮守
永平灤州遷安遵化等處

親送之十里許

諭以諸事勤慎四月己卯貝勒阿巴泰濟爾哈朗薩哈璘
軍還次陽什穆河

命巴克什達海覺羅龍什往

諭曰貝勒大臣等還自行間毋遽來朝謁可各還家祭祀
休沐其在彼已行事務及所聞消息即語來使于是貝

勒等具述之使臣代奏

太宗問曰是役俘獲視前二次何如達海奏曰人口較前
為多

太宗曰金銀幣帛雖多不足喜惟多得人為可喜耳金銀
幣帛用之有盡如收得一二賢能之人堪為國家之助
其利賴寧有窮也且將來休養生息我國人民日益繁
庶矣已丑

諭八旗大臣曰今歲須乘草青時出師豫辦軍器毋致貽

誤新收俘降之人當使衣食贍足毋致失所蓋撫養有法彼焉肯逃亡其逃亡者皆撫養不善故耳倘能加意軫惜則皆為我羽翼矣況身歷行間備嘗艱苦蒙

天眷佑畀我之人民尤宜深恤也至爾管地土軍器刑名諸大臣責任尤重其勿憚勞苦各勤職業至是

命貝勒杜度率官四十員兵一千赴永平駐防

頒敕阿敏曰永平遵化灤州遷安等處歸順之民耕種田禾宜嚴禁擾害此四處降民為漢人未降者所屬目豈

可令其失望又勿以形迹可疑妄指平民為奸細真奸

細豈易察獲恐反致官民驚駭不安耳

二貝勒阿敏在永平榜示曰爾

居民等妄意我即還軍因隱匿奸細不舉見明哨兵來不報夫我豈敢以

天與之土地委之而去耶今後有藏匿奸細者全家論死

妻子為奴其親兄弟而異居者乃免罪有擒獲奸

細來首者賞銀十兩并斬細攜帶之物亦盡與之

明兵及其哨卒經過我歸附鄉村爾民可即來報

有不報者察其蹤跡凡經過村莊悉誅之此四月

間二貝勒阿敏之所榜示已足致歸順官民驚駭

不安

太宗文皇帝是以中誠諄切也

又

救守將高鴻中甯完我曰爾等奏云朕宜速往恐我兵遲

一日則明國有一日之備所言誠是但明國小民自謀
生理兵丁在外別無家業惟恃官給錢糧我國出則為
兵入則為民耕戰二事未嘗偏廢先還之兵俱已各整
器具治家業課耕田地俟耕種既畢即令在家之人經
理收穫伊等軍器繕完牧馬肥壯朕即率之前往至爾
等于官民疾苦有所見聞須啟知二貝勒即阿敏加意撫
恤其休養降民分辦衣帽禁捕姦細愛惜官員等項朕
已有書諭二貝勒矣是月呼爾哈部二十一人來朝以

貂皮入貢

六月乙卯論失守永平灤州貝勒諸臣罪

先是明華州監軍道張春四川監紀官邱禾嘉錦
州總兵祖大壽山西總兵馬世龍山東總兵楊紹
基副將祖大樂祖可法張洪謨劉天祿曹恭誠孟
歲等于五月戊子率兵攻灤州我領兵大臣納穆
泰圖爾格湯古岱等各立汛地矢石齊發仍選精
銳出禦繞城轉戰屢敗明兵驅之壕外敵兵復攻

納穆泰一旗汎地火焚城樓一人執燾樹梯登城
鑲白旗阿玉什斬之奪其燾明兵稍卻時貝勒阿
敏碩託在永平聞灤州被圍遣總兵官巴篤禮率
數百人往援巴篤禮乘夜越敵營入城明兵發紅
衣礮擊壞城垛城樓焚納穆泰圖爾格湯古岱等
度力不能支于辛卯夜突圍走永平會天雨我兵
或二十人或三十人結隊以行明兵截戰我兵之
疾病被創及無馬者陣沒四百餘人時阿敏已盡

收遷安縣守兵及居民入永平城聞灤州已失遂
執永平城中新降漢官巡撫白養粹知府張養初
太僕寺卿陳王庭行人司崔及第主事白養元知
縣白珩掌印官陳清華王業宏陳元美參將羅墀
都司高攀桂等殺之乘夜棄永平城出冷口而還
並令鎮守遵化諸將亦棄城引衆還事

聞

太宗御殿集貝勒大臣及衆官

諭曰前出兵時每備禦下甲兵或二十人或十五人毀明國堅固邊牆長驅直入拔其堅城彼所號天下雄兵在在摧敗及

天以遵化永平灤州遷安與我隨令每備禦撥護軍三名甲兵二十名駐守其地兵數較前更多特命貝勒阿敏碩託及衆大臣為之統率乃因灤州被明兵攻破舉

天所與之四城盡棄之率衆遽歸此皆貝勒不盡忠為國諸臣復各顧其私故至此耳乙巳

召大臣和碩圖達爾漢固三泰喀克篤哩

諭曰前三次師還因行間勞苦凡有所獲悉聽攜去此番將卒棄我所得之城殺我所養之民祇將財物載歸徇私誤國之咎難以寬宥爾等往察悉令入官尋以鎮守遵化察哈喇范文程等突圍全軍而還所獲之物悉免察出六月壬子

詔許永平退歸士卒入城貝勒諸臣在十五里外候訊癸

丑集衆官

諭曰貝勒阿敏等以

天所與之城池土地棄之而歸爾等往問之灤州陷于明
人爾守城諸將全師而來耶鎮守永平貝勒及諸將守
城拒戰而後失永平耶抑出城迎戰不勝而來耶果爾
則情猶可恕乃伊等未見敵兵未曾張弓發矢遽爾奔
回且不能殿後全軍致為明人所襲是以明之金銀緞
帛為貴而攜之以我兵為賤而棄之也可往訊其故于
是往訊還奏俱服罪甲寅集衆官于庭逮繫永平

退歸總兵官以下備禦以上至

太宗念及士卒陷敵惻然淚下

諭曰明兵兩三月間何遽如是之強耶豈彼有神術變化歟豈朕所付爾等之兵尚寡力不能支歟抑爾諸臣皆懦弱歟夫明國之兵爾等豈未見其伎倆耶朕以圖爾格納穆泰二人為能故用為帥謂戰則必克謀則必成朕實嘉賴今不死彼處而歸何厚顏至此圖爾格奏曰臣等曾力諫貝勒奈貝勒不從乃歸耳湯古岱奏

曰臣等誠為失計宜請死

太宗諭曰汝等不能全師而歸陷于敵者敵人殺之至此者朕又殺之于朕為有益乎汝等縱謂敵勢強盛而歸何不收我士卒與之俱歸彼士卒何辜忍令其呼天搶地以就死也朕言念及此實痛惻于心

諭畢猶感傷墮淚羣臣亦皆泣下

太宗復諭師還時有摧鋒陷陣者察奏以阿爾津庫爾禪
覺善于灤州城內力戰既出復能殺敵圖賴阿山

武拜邦素伊勒木夜入敵營擊敗敵兵

命釋其縛阿拜曾勸諫阿敏不從非其罪亦釋之以鎮守
遷安兩旗官曾擊退敵兵鎮守永平三旗裨將止
聽從貝勒大臣驅使非能主其事者又巴篤禮彰
什巴阿福尼愛通阿翁阿岱等曾往救灤州突圍
入城均釋之其鎮守灤州三旗大臣及鎮守永平
三旗大臣俱押赴所司聽勘乙卯諸貝勒大臣等
歷數阿敏平日狂悖怨憤罪狀昭著違背

上命怙惡不悛當明兵攻灤州閱三晝夜阿敏擁五旗行
營兵及八旗護軍坐守觀望聽其城陷兵敗既不
親援又不發重兵止遣一二百人往致力弱陷敵
及灤州失守我兵走永平彼既不往迎又不待後
軍之至殺降順官民置留戍軍士不顧載財帛即
日奔還不聽正言止與其子洪科泰及部下阿爾
岱瑚什布錫琳額孟格德爾得赫等私相定議毀
壞基業喪失城池請誅之以彰國法

命從寬幽禁之奪所屬戶口俱給貝勒濟爾哈朗仍留莊
六園二及洪科泰莊二園一碩託當阿敏還軍時
徒流涕相勸不能力阻革爵奪所屬止留一備禦
戶口其器物俱免籍沒隨其兄即岳託行走湯古岱
出灤州城時棄兩旗兵前進以致軍行遇伏陷敵
者衆革職任籍其家布爾吉不勸諫湯古岱革職
奪所屬戶口納穆泰在灤州值明兵攻本旗汎地
不率諸將出擊及至永平不勸諫阿敏又不能殿

後全軍革職籍其家巴布泰聞明兵逼城不出擊
敵革職圖爾格拒敵不使逼城下且出城擊走敵
兵師旋復能殿後但不能力勸阿敏革一等總兵
官職任永順不勸阻阿敏反與商議速歸革職任
奪所屬戶口遊擊恩特微受礮燄稱傷重離汛致
敵兵前進陷城愛木布祿率先奔永平備禦松鄂
圖避敵不戰及出城遇敵復敗走三人俱並革職
籍其家鞭一百參將布山備禦赫勒尼瑪察不收

集所管兵遁歸俱革職備禦朗什中傷甚輕規避
離伍致敵穴地陷城革職鞭責托博輝之子達賚
因父病代管旗務不勸阻阿敏罷任免罪先是阿
敏盡殺永平遷安降順官民以其妻子分給將士
為奴至是

太宗諭曰朕留養官民已被屠戮何忍復令其妻子為奴
耶于是籍孤子嫠婦編為戶口給以房舍衣食俾無失
所

秋九月戊戌勛羣臣勤職

集八旗大臣

諭曰邇來將士等得無以干戈未息厲兵秣馬從征勞瘁
為苦抑知敵國侵陵讐怨所積義當征伐非彼實無罪
而我好為爭戰倘我按兵不動豈能必彼之相安無事
且盛暑嚴寒朕與諸貝勒親歷行間豈所樂為亦出于
不得已也大小臣工宜竭力奮勉無生厭怠之心撫恤
士卒精勤職業俾黎庶耕桑樂業衣食豐饒共享太平

豈不休哉是月喀喇沁部蘇布地萬丹等土默特部岱達爾漢阿渾索諾木等來朝

御殿設宴卻所獻駝馬

賜鞍馬甲冑貂皮狐裘銀盆等物遣歸

冬十月辛酉定編審壯丁例

凡老弱及年已近壯之幼丁近瀋陽者赴瀋陽勘驗近

東京者赴鞍山勘驗或有隱匿壯丁者將壯丁入官

本主及管領官並論罰知情者坐罪凡貝勒所屬
人戶如丙寅年九月初一日以後取在外備禦下
人編入者俱令退還惟置買人口及新成丁者勿
論凡貝勒家止許每備禦下四人供役有溢額者
察出啟知貝勒退還如貝勒不從即赴告法司或
不赴告經本人告發旁人舉首者與管旗之貝勒
大臣各坐以應得之罪

十一月癸卯宴來歸阿魯諸部長

先是阿魯伊蘇特部為察哈爾林丹汗所侵掠其
貝勒齋桑達爾漢噶爾瑪伊勒登拜沁伊勒登等
聞

太宗善養人民欲來歸遣使抒誠

太宗許之至是集部衆于錫喇穆掄河率台吉五十六人
入朝又阿魯四子部諸貝勒來歸率衆至邊境令
台吉伊爾扎木蘇赫墨爾根弼哩克翁輝佈桑先
至進駝馬貂裘等物

太宗各遣貝勒迎之五里外先後

御殿受朝大宴之是月那堪泰路之呼爾哈人瑪爾圖等

攜家屬來歸

命于寧古塔邊地駐牧

十二月壬子宥從獵誤射罪

先是十一月己卯

太宗行獵扎穆谷從臣譚泰阿哈尼堪躡追射中之麕持

獻

諭責之曰此非朕所射朕常禁人強取人物汝等乃欲朕自蹈之耶既而獲一麀諸臣質驗以為

上所射者

太宗亦以為非皆

命察給原射之人貝勒莽古爾泰之僕奪廝卒所射鹿豕
歸貝勒

太宗聞之歎曰彼隨役之人身困馬疲一無所得將何以
為生耶凡事雖小不可忽視恐積小成大耳

命莽古爾泰還之時節候嚴寒隨獵之人俱苦寒瑟縮垂帽護面及耳

太宗御窄帽手不入袖控縱馳射若不知寒蒙古各官莫不稱異至是十二月壬子

駕至積墩地行獵大貝勒代善部下蒙古猛克射鷹翻矢及

御衣代善急趨而前泣曰

上為衆所託命此矢倘及膚體奈何請誅猛克

太宗諭令姑緩代善固請

命鞭一百釋之諸貝勒言此人並未有功不過陣獲之人

獲罪重大豈宜寬宥

太宗曰此人係誤射故宥之所謂宥過無大也



皇清開國方略卷十三